

von Wulf Wager

Meiner Reisepass



Heit an i echt en furchtbar fruschrierenda Morga ghet. I war uf em Roothaus ond han en neua Reisepass bea'tragt. Naderich war i vorher beim ma Fotografa zom a biometrisch's Bildle macha lassa. I woiß jo, dass i 's nia auf's Titelbild von Mens Health oder vom Spiegel oder vom Stern schaff, aber bei dem, was so a biometrisches Portrait hergibt, do sieht sogar dr Clooney Schorsch aus wie a frisch kotzte Milchsupp.

Mei Passbildle lässt sich ohne Probleme für a Fahndungsfoto bei "Aktenzeichen xy ungelöst" verwenda. Oder als Abschreckbildle uf ra Schnapsflasch ("Wenn de weiter so saufsch, siehst bald aus wie der do!")

Onser Staat braucht solche Bilder zom ons jederzeit erkenna kenna. Selbscht Facebook erkennt ons per "Gesichtserkennung" ond wemmr noo so a grauslichs Gri-massa-Foto postat. Aber dr Staat bringt des net na. I woiß et, wer uf dia Scheiß-Idee komma ischt, dass mr uf Ausweisfotos net lächla derf. Drbei woiß mr doch, dass koi Medikament a Lächla ersetza ka. Aber dr Staat will ons jo au net xond erhalta, sonst dät 'r meh für d' Xondheitsvorsorg ond dät a Xondheitskass statt ra Krankakass einführa. Aber des isch a anders Thema.

Zrück zu meim Ausweis. Jonger, ond i be mr echt vorkomma wie a Schwerverbrecher. Hend dia doch meine Fingerabdrück eig'scantt. Ond des Ganze hot am End au noch 60 (!) Eura koschtet. Ja leck me no am Arsch. Eigentlich sott ma nemme fortfahra. Erschtens isch des für Dei persönliche Co2-Bilanz besser, zwoitens sparsch Geld ond drittens ersparsch de Grenzer dein furchtbara Passbildanblick. Also Leitla, bleibat em Land ond fressat Rettich - so hot mei Ähne äwwl gsait.

Bis näggschd Woch'

Ihr

Wulf Wager